



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 3

**Taylor-i Sachin indang
ODI record ka ajatetogo**

**Vijay-i UK nung sen crore 12,300
investment atema tenangzüktepba yaglu**

VOL. XXIII ISSUE NO. 336 (ADOK 336) DIMAPUR RASEMNÜ (WEDNESDAY) RONGJUI (SEPTEMBER) 16, 2026 ₹ 5.00

UPI ajanga sen yokba atema 0.4% agitsü

Engineer temi shilem agiba ajanga loktiliba tejakleni aoer: Dr. Rhutso

**UPI PAYMENTS
ABOVE ₹2,000
TO ATTRACT
0.4% MDR
FROM OCTOBER 15**

Small payments stay free.
Here's what you need to know.

Transaction value	% Applicable MDR	₹ MDR paid by merchant
Up to ₹2,000	0%	₹0
₹3,000	0.40%	₹12
₹10,000	0.40%	₹40
₹20,000	0.40%	₹80
₹30,000	0.40%	₹120
₹40,000	0.40%	₹160
₹50,000	0.40%	₹200
₹60,000	0.40%	₹240
₹70,000	0.40%	₹280
₹75,000 and above	Fixed cap	₹300
₹1,00,000	Fixed cap	₹300
₹5,00,000	Fixed cap	₹300

No charges on UPI payments up to ₹2,000

0.40% MDR applies to merchants above ₹2,000

Maximum ₹300 per transaction

New Delhi, September 15, 2026 (Agencies): India nung click-and-pay UPI services atema sen agitsü aser ibaji Rs 2,000 payments nungi tema atema lir. Ajisüaka, person-to-person transactions bo angati dang asütsü.

Nisung kati merchant ka nem Rs 2,000 tema sen enoktsüra 0.4% agitsü. Ajisüaka merchant ka nem Rs 75,000 aser tema enoktsüra transaction shia MDR Rs 300 agitsü ta National Payments Corporation of India

(NPCI)-i metetdaksüogo.

Nai UPI ajanga nü medemer dangi sen yokra, iba dang person-to-person transaction ta ajar aser iba atemabo sen kwika südir süang angati dang asütsü.

Railways, telecom services, insurance, aser fuel amala merchant categories telemsa nung Rs 2,000 tema UPI payments asüdag Rs 5 flat rate agitsü ta NPCI-isa ashi.

Iba framework tasenba ya October 15, 2026 nungi mapa tenzüksü ta parnokisa shisem.

Pochury Black Day Memorial Cup 2026 tenzükogo

Dimapur, September 15, 2026 (TYO): September 15, 2026 nungi Meluri Local Ground nung 12 buba Pochury Black Day Memorial Cup 2026 tenzükogo.

Iba sentong nung MLA & Science & Technology department Advisor Kuzholuzo (Azo) Nienu-i tetushi süa jaoker ama shilem agi.

"Naga nungeri non violence policy agi raratsüla. Asenoki India den timi asen sasa ketdangüsü aotsü taginüba atema inyaksüla aser prangpong amer menokdaksüla" ta Azo-i o jembidang ashi.

"Pochury Black Day amungba ajanga Pochury tesemtem nung reshikangshi tapu balala inyakba bilemteta temulung raksar. Phor, Yisi, Matikhrü aser tanga yimtsüngtem nung yimtsüng lennirtem aser tai maketba yimdaklirtemi Naga nüjiso atema rara nung bendanga agütsü" ta pai ashi.

16th Punjab Regiment ajanga nübortem kanga reshikangshia liasü aser item tatalokba ya magizüker aser tatok

magütsüteter. Ajisüaka, Khristan ka ama asenoki tatok agütsütsü tim aser tesüiba amadoker tulusang Tsüngrem nem dang obendangsü yutsütsüla ta Advisor Azo-isa ayongzüik.

Asenoki tesüibaji toktsüdi aser asen tarutsü tajung meraksatsüsa lidi. Pochury nunger adianutemi Rom 12.19 nung ashiba ama tayang meküpzükli saka Tsüngremer ain nem yutsüdi, kechiyong tayang küpzüksüji Tsüngrem meyong lir ta Azo-isa ashi.

Iba sentong nung Naga Students' Federation (NSF) vice president Vimeyiekho Vitso-ia o jembidang NSF-i Pochury nunger den külemi noktaka lir aser Naga nüjiso atema rara nung taküm bendanga agütsürtem tushir ta ashi.

Pochury Black Day Memorial Cup ya September 24, 2026 tashi asayatsü aser takok marok angur nem Rs 1 lakh, tanabuba jenjang angur nem Rs. 70,000 aser semi finalists atongba telok anaprong nem Rs. 30,000 agütsütsü.

Dimapur, September 15, 2026 (TYO): Engineer temi shilem agiba ajanga loktiliba tejakleni aoer ta MLA, Dr. Tseilhoutuo Rhutso-i ashi.

Federation of Nagaland State Engineering Service Associations (FONSESA)-i September 15, 2026 nü National Engineers' Day Celebration cum Biennial General Conference 2026 amungdang Dr. Rhutso-i iba ya ashi.

Iba sentong ya "Engineering Excellence for a Sustainable and Technological Development" omen nung ajemdaker amung.

Sentong nung tetushi süa jaokerji MLA Dr. Rhutso liasü aser pai o jembidang Sir M. Visvesvaraya ajanga shilem agiba aser senmang toktsüba indang bilemteta jembii.

"Engineer temi shilem magira loktiliba kecha renloka maotsü. Science, Technology, Engineering aser Mathematics ajanga sustainable development anir aoer anungji enegineer temi lanuputu ajungmesotsü aser len anitsü ayongzüker" ta Dr. Rhutso-i Engineers' Day onük jembii.

Engineering aser medical profession külemi aoer. Mapa anaprong ajanga meimchirtem anisüngzüksü aser junga alitsü atema inyaker. Engineering innovation ajanga medical technologies aser instruments

aika yanglutetogo anungji iba mapa ana ya teti yaritepa aotsüla ta pai ashi.

Dr. Rhutso-isa ketdangsubaren nung technical professionals talila shilem agitsü ayongzüik. "Nenoki shia metetba ajanga planning aser development projects inyakba tajungba akümtsü" ta pai ashi.

Engineers aser tanga professionals-i loktiliba tajungba akümtsü atema pei shisatsü aser sempet amshitsüla, lanur professionals len anitsüla aser senmang tajung toktsür aotsüla ta paisa ayongzüik.

FONSESA President Er. Fineson Pojar-i o jembidang M. Visvesvaraya ajanga shilem agiba bilemteta jembii. Pa ya September 15, 1861 nü aso aser 1955 nung Bharat Ratna sempet agizük ta Er. Pojar-i ashi.

Nagaland nung pei pei constituency sasep nung dang melii aser mebilemi lennirtemi mangdang tuluba ayutsüla aser Nagaland renloksü aser longjemtsü atema inyaksü ayongzüker ta FONSESA President-isa ashi.

FONSESA tetenzükertem nem tetushi agütsür. Parnoki tarutsü asoshi mangdang tulu wadang balala nungi engineers sabang ka nung adenshidaksü aser shisa lemsatepa, kati ka ayongzüktepa public service

tajungba kümdaksü ta Er. Pojar-isa ashi.

FONSESA indang nükjidongji engineers külemi longjemtsü aser sorkar pusema nungittsü atema lir. Anungji züngsem ajaki telok tashi tashi aittsü atema amalitep alitsü aser pei nija atema masü ajak ajungtsü atema bilema inyaksü ayongzüker ta paisa ashi.

Iba sentong nung Rooftop Solar (RTS) indang technical presentation ka lemsatepa liasü. Iba shilem ya Nagaland Solar Mission kübok APEN-i PM-SURYA GHAR: MUFT BIJLI YOJANA den yaritepa agi.

Iba scheme kübok consumers-i Central aser State subsidies angutsü. 1 kW installation cost atema Rs 53,000 for, 2 kW atema Rs 1.06 lakh for aser 3 kW atema Rs 1.35 lakh subsidy agütsür ta APEN-i metetdaksü.

Nagaland nung empanelled vendors 21 nungi Rooftop Solar (RTS) shimteta enoktsü akok. Iba nung vendor aser Department of Power, Nagaland ajanga installation maparen inyaker. Consumers-i pei indang mobile number, email ID aser Consumer ID amshia official portal, www.pmsuryaghar.gov.in nung tenüng agütsütsü akok. Iba scheme ya March 31, 2027 tashi inyaksü ta APEN-isa ashi.

Nagaland nung Rs 1,214 crore tim mesüi amshiogo: CAG

Dimapur, September 15, 2026 (TYO): Comptroller and Auditor General of India (CAG)-i Nagaland government department balala nung Rs 1,214.37 crore tashi tim mesüi amshiba, akoksaba aser auyaba atema ken o 30 tashi benoka lir.

Rs 1,187.88 crore shi amshiba ken o 25 tashi departmental aser criminal investigation atar aser Rs 26.49 crore shi amshiba ken o 5 tashi okadak metembang lir ta CAG indang State Finances Audit Report for 2024-25 nung shia lir.

Ken o aika küm aika metembangteti arur aser ken o 25 tashi küm pungu tema süiogo. Ken o rongnung sen teimtiba amshibaji Food & Civil Supplies Department nung Rs 952 crore amshiba lir aser iba atema departmental aser criminal investigation atar ta CAG-isa metetdaksüogo.

Tanüngbaji School Education nung Rs 83.31 crore amshiba ken o asem, Water Resources

Department nung Rs 28.60 crore aser Taxes nung Rs 25.82 crore tim mesüi amshiba lir ta parnokisa ashi.

Maneni, Nagaland nung autonomous bodies-i mapang shitak nung accounts submission menuba indang shia lir. 2024-25 tashi nung annual accounts 42 magütsü liasü aser item teloktem rongnung Nagaland Building & Other Construction Workers' Welfare Board, State Commission for Protection of Child Rights, State Human Rights Commission aser Nagaland State Legal Services Authority dena lir.

March 31, 2025 tashi nung Rs 365.25 crore amshiba 210 utilisation certificates magütsü lira ser iba den Rs 448.17 crore indang Abstract Contingent bills 307 tashi adjustment masü lir ta CAG-isa metetdaksüogo.

CAG-isa departmental aser criminal investigations tekaraba nung inyaksü aser financial accountability o transparency tajungba akümtsü atema maparen akangshitsü shidangogo.

Public Accounts Committee-i ashiba osang nung ajemdaker Action Taken Notes menuba indanga CAG-isa metetdaksüogo.

**Nagaland Lokayukta-i
nisung 34 merenshi; 240
mapa nungi anentsü**

Külen, Nagaland Lokayukta indang 2025 Annual Report nung reporting period mapang ken o 31 angadanga aser Rs 1.22 crore meyiya anguba indang shia lir.

Nagaland Lokayukta-isa nisung 34 merenshiba aser nisung 240 mapa nungi anentsüba indang shia lir.

December 18, 2024 nungi February 12, 2026 tsüngda Lokayukta-i ken o 86 benoka liasü aser iba nung Preliminary Enquiries (PE) 68 aser Regular Cases (RC) 18 liasü.

Ken o 31 nungi PE 26 aser RC 5 tashi tembangogo. Ano, February 12, 2026 tashi department balala nung PE 42 aser RC 10 dena ken o 52 tashi bushisüngdang südar ta Nagaland Lokayukta-isa metetdaksüogo.



Live Entertainment Economy nung state-i mera tasen agir

Dimapur, Rongjui/Sept. 15 (TYO): Nagaland nung Live Entertainment Economy Framework indang jembishinütsü atema senden ka September 15, 2026 nü Directorate of Information & Public Relations, Kohima nung Secretary, Information and Public Relations, Orenthung Lotha, IAS lenisüba kübok mena liasü.

Secretary, Information and Public Relations, Orenthung Lotha, IAS-i iba senden nung jembidang State nung rongsenketzüng ainba aser nüburtem rongsen lenmang anguba nung Live Entertainment Sector ya tanir ama akumba indang lemsatepa liasü.

Live entertainment ya sobaliba saya aser südok-sünemba tesem ka ama meblemütsüla saka revenue aser employment adokdaksütsü aser sendaktepa aliba industries animesotsü tashi keta aliba economic sector tongtipang ka ama bilemütsüla, ta pai ashi.

Talisa state nung sentongtem sen aruba sapang ka kumdaksütsü, stakeholders rongsenketzüng ajangzüka state rongsenketzüng nunga

yarisemtsüsa sentong tulu ayongzüksü nüngdaker, ta Lotha-i ashi.

Sobaliba, kentenba sempet, creative community aser tejangraba tulu aliba lanurtem tsütsü Nagaland nung tashi peria lir, koba ajanga live entertainment ecosystem tajung adokdaksütsü asoshi tamendak dak tajung agütsütsü, ta ashi.

Paisa department balala tsüngta amalitep akatsü aser lungjemer sentong tulu tem takok ngua ayongzüksü ayongzüka liasü.

Director, Information and Public Relations, Dzüvinuo Theünuo-i jembidang, Nagaland atema Live Entertainment Economy Frameworks yanglutsü atema LiveNow team aliba atema pelaba lemsatepa liasü.

Director, LiveNow, Atsunglir Jamir-i Nagaland nung Live Entertainment Sector amenoktsü asoshi lenla balala asadangba indang osang tejangja agüja liasü.

Pai-a state rongsenketzüng atema iba sector ya shilem agir tajung ka akumtsü teimla aliba lemsatepa liasü.

Jamir-i Live Entertainment Sector indang lenla balala aser

rongsenketzüng tajangzükalitsüba, talisa skill development, employment generation, entrepreneurship aser tourism ajungketba indang rateta ashi.

Live entertainment ecosystem tajung ajanga local artists, performers, sentong ketdangsür, technicians, production crews aser sendaktepa aliba service agütsür atema lenmang tasen lapoktsütsü aser ibaji ajanga state nung lanurtem nem employment aser senotsü aruba lenmang agütsütsü, ta pai ashi.

State nung national aser international-standard sentong ayongzüksü atema tang aliba ki o jen aser facilities tashi itshitsü aser tajungba kumdaksütsü tongtipang lir ta ashi.

Senden nung parnoki bushitetba tem nung olemtepa aser shisa lemsatepa ano tapet stakeholders aser sendaktepa aliba department den shisa agitepa state nung Live Entertainment Economy Framework tajungba kuma yanglutsü jembia liasü.

Nagaland atema Live Entertainment Economy Framework yanglutsü asoshi LiveNow ya consultants ama shima lir.

State-level SDGs aser Reform Utsav 2026 nung Chümoukedima shilem agi

Dimapur, Rongjui/Sept. 15 (TYO): Chümoukedima District Administration den department balala nungi District-level ketdangsürtemi September 15, 2026 nü Sustainable Development Goals (SDGs) indang state-level Video Conference aser linük tesem ajunga nung agiba "Reform Utsav 2026" campaign nung Deputy Commissioner, Chümoukedima indang Conference Hall nungi dena liasü.

Iba mapang Principal Secretary & Development Commissioner, Nagaland, Y. Kikheto Sema, IAS ajanga district ajunga indag SDG performaces tejangja presentation agütsü aser SDGs nungya nükjidong 16 aser targets 84 lir aser terenlok maparen ajnga item nükjidong aser targets dak rangloker inyaksüla, ta ashi.

Pai Ministry aser Department portals nung terenlok indang osangtem mapang shidak nung update sütsütsü ayongzüka liasü.

Pai Deputy Commissioners tem dang pei district nung sorkar indang ki o jen jenjang mejungi alibatem densema nüngdakbatem jangjateptsü

ayongzüka liasü.

Pai Nagaland nung Aspirational Blocks asem - Akuhaito, Khongsa aser Thonoknyu indang tongmelang agi rateta ashi aser SDG goals aser targets den apet item tesemtem nung terenlok asoshi rangloksü ayongzükal.

Pai tang teinyakdak projects aser terenlok mapatem semdanga district ajungai aotsü ta metetdaksü.

Reform Utsav 2026 indang PowerPoint presentation ya Kumar Ramnikant, IAS, Secretary, Industries & Commerce ajanga agüja liasü.

Deputy Commissioner, Chümoukedima, Polan John, NCS ajanga senden nung dena aliba ketdangsürtem den jembidang, SDG mapa kuma inyaka aotsü atema department balala lungjemer inyaksü nüngdakba indang ashi.

Pai data shidak bendentsü, osang shidak agütsütsü aser mapang shidak nung osang tem upload süa district inyakyim shidak portals nung sayudaksütsü asoshi shia liasü.

Pai tangar memenepba tesemtem nung tali rangloksü aser SDG targets tongtettsü atema inyaksü ayongzüka liasü.

State nung Legal Metrology & Consumer Protection Laws shidak amshitsü

Dimapur, Rongjui/Sept. 15 (TYO): Department of Legal Metrology & Consumer Protection, Nagaland ajanga sangdong ka nung Nagaland nung aliba traders, dealers, retailers, wholesalers, manufactures, packers aser shishilempaba mapa inyakba nisung ajunga dang Legal Metrology Act, 2009, Legal Metrology (General) Rules, 2011, Legal Metrology (Packaged Commodities) Rules, 2011 aser tanga Legal Metrology Laws/rules sülen shidak anidaktsü metetdaksüogo.

Traders/dealers ajaki trade aser commercial transactions atema amshiba weights and measures/instruments tem mapang shidak nung Legal Metrology & Consumer Protection Department ajanga tendanger stamped asütsüla.

Weighing mesüra measuring instrument mejangjaba, stamped masüba, tamajung, memürek aser loam stuck mesüra non-standard weighing mesüra measuring instrument tem transaction mesüra trade kecha nunga mamshitsü, ta ashi.

Tuozük, asadanga mesüra züngdana ayokba osettem ajunga standard units tejangja aser verified instruments amshia transactions asütsüla. Pre-packaged oset ajunga

Legal Metrology (Packaged Commodities) Rules, 2011 nung shia aliba ama net quantity, MRP, manufacture/packer/importer indang tenüng aser address aser tanga nüngdakba osangtsüsang tem shidak agüja sangdongtsüla.

Traders/dealers temi licences, certificates, verification certificvates, records aser documents tem Legal Metrology Laws aser rules nung shia aliba ama anepalua ayutsüla aser amshitsüla.

Traders/dealer shingiaia metokmeperitsüsa, weighing mesüra measurement meshidak, mesüra Legal Metrology ozüngtem den mapetba yimya tem kecha mamshitsüla aser item totuyuba sülen tang nungi tenzüka shidak anidaktsü metetdaksür, ta ashi.

Department indang Legal Metrology Officers temi state tesem ajunga nung inspections aser enforcement mapa inyaksü aser iba mapang aibelen putetra, Legal Metrology Acts, 2009 aser danga Acts aser Rules nung aliba ama merenshitsü.

Anungji traders aser dealers ajungai Legal Metrology & Consumer Protection Department den amalitep akatsü ayongzüker, ta sangdong ajangasa ashi.

Federal Bank

The Federal Bank Ltd., Zonal Office, Kolkata, Avani Signature, 91A/1 Park Street, opposite to St. Xavier's College, Kolkata, West Bengal, 700016

NOTICE FOR AUCTION OF GOLD

IT IS HEREBY NOTIFIED BY FEDERAL BANK LTD., ("Bank") TO ALL CONCERNED AND THE GENERAL PUBLIC THAT GOLD ORNAMENTS/JEWELLERY/COINS SUBMITTED BY THE BORROWERS TO THE BANK AT THE TIME OF AVAILING GOLD LOAN WILL BE AUCTIONED ON AN "AS IS WHERE IS BASIS AND AS IS WHAT IS BASIS" FOR BELOW MENTIONED LOAN ACCOUNTS OF THE BORROWERS WHO HAVE DEFAULTED IN REPAYMENT OF LOAN AMOUNT, DESPITE REPEATED NOTICES.

Details of defaulted loan accounts:

Sl No	Venue	A/c name	Loan Account No.	No. of jewellery / coins	Gross weight (in gms)
1	The Federal Bank Ltd, Dimapur Branch, Nyamolotha Road, Old Church Road, Dimapur, Nagaland, Dimapur, Nagaland, 797 112	NALINA KUMAR	11886900005025	6	52.5
2	The Federal Bank Ltd, Dimapur Branch, Nyamolotha Road, Old Church Road, Dimapur, Nagaland, Dimapur, Nagaland, 797 112	K VILIKA ZHIMO	11886900005348	6	85.9
3	The Federal Bank Ltd, Dimapur Branch, Nyamolotha Road, Old Church Road, Dimapur, Nagaland, Dimapur, Nagaland, 797 112	KAVIHOLI SUMI	11886100046928	5	4.4
4	The Federal Bank Ltd, Dimapur Branch, Nyamolotha Road, Old Church Road, Dimapur, Nagaland, Dimapur, Nagaland, 797 112	AKASH DAS	11886100046514	3	37.6
5	The Federal Bank Ltd, Dimapur Branch, Nyamolotha Road, Old Church Road, Dimapur, Nagaland, Dimapur, Nagaland, 797 112	ROMITO KATTY	11886100046985	1	7.2
6	The Federal Bank Ltd, Dimapur Branch, Nyamolotha Road, Old Church Road, Dimapur, Nagaland, Dimapur, Nagaland, 797 112	DILIP KUMAR DAS	11886900004598	1	9.9
7	The Federal Bank Ltd, Dimapur Branch, Nyamolotha Road, Old Church Road, Dimapur, Nagaland, Dimapur, Nagaland, 797 112	BISWAJIT ROY	11886900005470	6	15

1) Details of Auction
Date of auction: 22-09-2026 Time: 11:00 AM to 4:00 PM
Reserve Price: As determined by an approved valuer, available at the time of auction
2) The bidders shall carry their valid ID Card/PAN Card at the auction venue.
3) The Terms & Conditions ("T&Cs") pertaining to this public auction can be accessed by the bidders through <https://www.federal.bank.in/gold-loan-tnr-for-auction>. Submission of bid by the bidders will be construed as deemed acceptance of the said T&Cs.
4) If liabilities of the Bank are outstanding even after adjustment of the amount received through auction, necessary legal action will be initiated against the Borrowers to recover the remaining dues.
5) If the Borrower is deceased, this auction notice will be applicable to the Legal Heirs of the Borrower.
6) The successful bidder shall make payment in full (i.e. 100% of the winning bid amount plus applicable GST and other taxes/charges) on the same day of auction. However, Federal Bank may at its sole discretion permit deferment of payment to the next working day in exceptional cases.
7) The successful bidder shall take delivery of the Gold Jewellery/Coins within 2 days from the date of auction.
8) The decision of the Bank regarding acceptance of bid shall be final and binding. The Bank has the right to cancel the auction without prior intimation to the Borrowers.

Place: Kolkata
Date: 15.09.2026

Sd/- Authorised Officer
For The Federal Bank Ltd



Union Home Minister Amit Saha, Minister C R Patil, Uttrakhand Chief Minister Pushkar Sinfgh Dhami, Himachal Pradesh CM Sukhvinder Singh Sukhi, Uttar Pradesh CM Yogi Adityanath, Rajasthan CM Bhajan Lal Sharma, Delhi CM Rekha Gupta, Haryana CM Nsyab Singh Saini aser tangartem Kishau Project agreement nung sign asüba mapang tangokba noksa nung angur.

Vijay-i UK nung sen crore 12,300 investment atema tenangzüktepba yaglu

New Delhi, Rongjui/ September 15 (Agencies): Tamil Nadu Chief Minister Vijay, shiba tang UK semdangba mapang ka lir pai Hombarnü London nung sen crore 12,300 dak tema investment atema MoU ishika nung sign süogo.

Tamil Nadu ya Asia nung advanced manufacturing aser technology nung tongtimbang tesem ka kümdaktsütsü nükjidong nung item tenangzüktepba yangluogo. Item investment tem ajanga state ajunga nung mapa 9,400 dak tema adokdaktsütsü imlar.

Sen timtiba entoka inyaktüsü asoshi tenangzüktepba tulubaji auto component company Samvardhana Motherson International Limited den yangluogo. European aser UK-based joint venture partner tem den company yagi taruba küm pongu tsüngda sen crore 11,000 entoka mapa inyaktüsü atema Guidance Tamil Nadu den MoU ka nung sign süogo, ta PTI sangdong ka ajanga metetdaktsü.

Project nung shilem ka ama Motherson-i, Tamil Nadu kübok tesem balala nung integrated design, engineering, manufacturing, assembly aser logistics facility tem amenoktsü, aser iba ajanga advanced engineering aser supply chain operation kija nunga mapa 7000 shi adokdaktsütsü imlar.

Tenangzüktepba kübok digital infrastructure, technical consultancy aser heavy equipment manufacturing densema lir.

Professional services firm Ernst & Young (EY)-i, Tamil Nadu nung Global Capability Centre ka amenoktsü atema sen crore 1,000 entoktsü nangzükogo. Swedish technology company Sigma Technology Group-ia Tamil Nadu nung parnok indang digital services aser engineering operation atsülangtsü asoshi tenangzüktepba ka nung sign süogo.

Electrical manufacturing sector nunga UK nung amendaker aliba power equipment yanglur Wilson Power Solutions-i Tiruvallur district nung manufacturing unit tasen ka amenoktsü atema sen crore 300 entoktsü asoshi MoU ka nung sign süogo. Iba facility yagi local mapa 400 shi adokdaktsütsü imlar.

MoU nung Group Technical Director Hari Krishna Malepathy aser Group Finance Director Dennis Sorby den Guidance Tamil Nadu Managing Director Deepak Jacob nunger-i sign süa liasü.

Industries Minister S Keerthana-i CM Vijay nem tenüngsang agütsüogo, aser ashiba agi, pa lenisüba nung

Tamil Nadu nung sen entoktsü atema investor tem aika atsüa arudar.

"Chief minister-i London semdangba mapang manufacturing, technology aser Global Capability Centre tem nung sen entoktsü atema tenangzüktepba yangluogo. Samvardhana Motherson International-i sen crore 11,000 entoka mapa inyaktüsü nangzükba ajanga design, engineering, manufacturing, assembly aser logistics nung mapa 7,000 shi adokdaktsütsü," ta lai ashi.

"Tamil Nadu nung Global Capability Centre ka amenoktsü atema EY-i sen crore 1000 entoktsü nangzükba ajanga mapa 2000 dak tema adokdaktsütsü. Sigma Technology Group-ia Tamil Nadu nung parnok maparen atsülanga aotsü nangzükogo aser iba ajanga state ya technology aser digital service tem atema tongtimbang tesem ka kümdaktsütsü," ta lai shisem.

Europe nung auto spare parts yangluba company kati India nung sen crore 3,000 entoka mapa inyaktüsü asoshi Tamil Nadu shimogo. Company yagi Guidance Tamil Nadu Managing Director Deepak Jacob nem parnok indang letter of intent agütsüogo.

(Maneni tapak 7 nung...)



Tim masüba mapa inyak ta tai tonglokja Bihar Police Sub-Inspector recruitment exam aser 70th BPSC Combined Competitive Examination thier tanaben agitsü atema candidates temi takhangba agüja Patna nung longkak aйдang tangokba noksa ka yangi angur.

Graham Staines tepsetsang chioktsü mepeshiba magizük

New Delhi, Rongjui/ September 15 (Agencies): Odisha indang sentence review board-i, Australia nunger missionary Graham Staines aser par jabaso ana 1999 küm mejang alidang rongseta südaktsüba atema taküm tepeyong atema tepuokdak yua alisang Dara Singh chioktsü mepeshiba magizük.

September 17 Supreme Court nung iba ken o anagdangtsü lia pa temerenshi ajemtsütsüba ken o mejangjai aliba tang jangjaogo. Okadaki taoba hopta state sorkar dang Singh-i pa chioktsü atema mepishiba dak sendakba nung parnok tamendakdak jangja jangja metetdaktsütsü tetuyuba agüja liasü.

Singh ya tepuokdak küm 26 dak tema yua lir. Odisha indang 2022 remission guidelines kübok pa jelia chioktsü atema asadangtsü asoshi temsüa kümogo. Singh-i 2024 küm iba guideline kübok pa jelia chioktsü atema asadangtsü asoshi Odisha nem tetuyuba agütsütsü asoshi Supreme Court dang mepeshia liasü.

State Sentence Review Board-i August 31 nü senden ka ayongzüka iba ken o asadang aser Singh chiokba ajanga lokti nung mepetmesü adoktsü akok ta ashi.

2025 küm March ita Keonjhar administration-i, lokti nung mepetmesü kecha madoktsü atema jenjang tapet

kar agir Singh ya jelia chioktsü asoshi recommend asü. Osang ajanga ashiba agi, Dara Sena den sensaka alir nisung 200 nungi 250 shi-i August 15 nü Keonjhar District Jail kima longkak aita liasü.

Board-i ashiba agi, parnok nung recommendation tejangja ka magizük aser ken o mejangja ta shia Singh jelia mechioktsü atema tetuyuba agüja liasü.

Board-isa, 2016, 2019, 2020, 2022 aser 2023 küm Singh jelia chioktsü atema mepishiba magizük. Lokti nung mepetmesü madokdaktsütsü atema iba jenjang ya agir ta parnoki ashi.

Board-i parnok telemetba ya maneni menoa magütsüra state ketdangsürtem jaoktsü akok ta Supreme Court-i tekümdangtsü metetdaktsür liasü. August 19 nü SC-i board dang September 2 nü tashi nungbo telemetba agir metetdaktsütsü tetuyuba agüja liasü.

Central Bureau of Investigation court kati Singh ya 2003 küm nisung tepsetba, criminal conspiracy aser longkak aita atema tasüba agi merenshitsü asoshi obendanga agüja liasü. 2005 küm ken o nung aija alir 11 nem taitok agütsü aser Singh tasüba agi merenshitsü obendang agütsür aliba ya taküm tepeyong tepuokdak ayutsüba agi melenja liasü. Singh-i iba o bendang ya agintsütsü mepishiba Supreme Court-i magizük.

Chandranath tepsettsü atema 'Bhaipo Gang nem sen crore 2 agütsü



New Delhi, Rongjui/ September 15 (Agencies): West Bengal Chief Minister Suwendu Adhikari-i ashiba agi, Chandranath Rath tepsettsü atema sen crore 2 alang contract agüja liasü. Adhikari-i Mongolbarnü ashiba agi, Rath tepsetba nung "bhaipo gang" densema liasü.

"Chandra tepsettertem nem sen crore 2 shi agüja liasü. Bhaipo Gang densema liasü. Bushisüngdangba sülen CBI-i telemetba agitsü," ta Suwendu-i osangbenertem dang ashi.

"CBI-i bushisüngdang kanga takok ngua agiyonga odar. Pa akhasang, aser ken o nung sendaka alirtem ajak CBI-i puogo," ta paisa shisem.

Rath shiba Adhikari indang personal assistant liasü, pa May ita tepset. Pa amaki nisungtem ya motorcycle pezü nung mener aru.

CBI-i, August 7 nü Barasat

nung Additional Chief Judicial Magistrate indang court nung chargesheet ka benokogo. Rath tepsettsü asoshi tasa asartem rongnung Sagar Sonkar ya tongtiba liasü, ta chargesheet nung shia lir.

Chargesheet nungsa nisung 12 aitsüba shisema lir aser parnok rongnungi 11 bo puogo. Parnok rongnungi Krishna Kumar Singh dang mapu lir, shiba Bihar nungi lir.

Pur alirtem rongnung Kolkata nungi Sagar aser pa adianu Saheb Sonkar, Uttar Pradesh nung alir Vikash Mishra, Vinay Rai, Sanjay Rai, Gyanendra Singh, Raj Kumar Singh, Golu Singh aser Naveen Kumar Singh nunger densema lir. Aija alir rongnung Mayank Raj Mishra aser Vicky Maurya na ya Bihar nungi lir.

CBI-i iba ken o nung tenük kuli agütsür nisung 585 zülüokogo.



TIR YIMYIM YIMOBILEM (EDITORIAL)

DIMAPUR WEDNESDAY, SEPTEMBER (RONGJUI) 16, 2026

Tashidak nem mekokdaksü !

Asenok ajak atema tatishitsü tajung asütsüsa osang tajung kaji, Germany nunger Tennis asayar Alexander Zverev-i tebur kija Tennis asaya US Open asayamung nung yakanü US nunger Ben Shelton koker iba asayamung nung tematiba takok jenjang ngutetba ya asütsü. Pai taküm küm US Open nung anguba takok anguba ya dang masü saka French Open-a kokogo. Atangji, French mesüra US Open ama alima nung nungtuugu Tennis asayamung nung tematiba takok jenjangji shibai ngudir nguang, aji takok tulu lir, ajisüaka tang Zverev-i anguba takok yabo asayamung nung tangari anguba takok dang nungi kanga agia tuluba aser nisung ajak asoshi tatishitsü tajung agutsüsa tayongzükbä tuluka dena alibaji, pa dak ya 'Type 1 Diabetes' tashidak lir. Pa küm 4 asüandang, pa temang nung diabetes aliba putet, anungji pa temang tendangba doctor-i tetsü dang lar jabaso takümji tarutsü nung asaya nung shilem agitsü tasak asütsü ta ashi. Ajisüaka, Zverev tetsü doctori ashiba o nungji temulung majem aser ozü jabaso ya pai pa taküm nung kechi kümner kümtettsü; pai tennis asayar nungtuugu ka kümnüra ajia kümtettsü ta lai la temulung nung terenemba ka yur lar jabaso anepalutsü tenzü. Tanü Zverev pa arishi küm 29 nung pa küm 4 tanur asüandang tetsü la mulung nung telemtetba agiba atalokogo. Iba jagi Zverev-i pai tennis nung takok tulu anguba tenüngsangji tetsü nem agütsü. Atangji, Zverev-i ashi ama, asenok nisung shia dak temang nung tashidak kabosa alitsü, saka asen taküm lia aotsübarenji asen dak aketba tashidak mulung masü saka asen mulung, anungji aseni asen temang tamshi shia amshira asenoki tashidakji kokadoktsü saka asenoki asen temang ya tashidak nemji dang anidoktsüra, temetet, asen takümji tashidak jagi kokadoktsü. Asenok ajak atema Zverev taküm nungi angazüksüba kaji, aser taküm aser temang nung tashidak kokteta alibaji tashidak anepba kisüngbo masü saka tashidak manepaka, asen dak tashidaka mali ama asenok taküm nung aseni jangraba mapa nung takok ngua inyakteta litetbaji lir. Zverev amaji asenok aika dak diabetes keta lir, ano karbo cancer agi shiranga alitsüa akok, ajisüaka asenoki asenok dak aketba tashidaktemji shirangdaksüba tashidak amato masü saka alima yimya ka amato-ang bilema, tashidak nemji asenok manishidaksü asenokiang tashidakji kokteta anishitsü merangtsüla. Temang nung tashidak lirji, chiyongtsüa mashi machitsü, yimdongia maotsü, mapaa meinyaktsü saka asen kija chiyongtsü tilala chir kidang kecha meinyaki kazütsü ta masü, saka asenoki akok tashi temang nung tashi aittsüba chiyongtsü shitak bushia peria achitsü, temang arakzüa jajatsü, pei akokba mapabo inyaktsü aser loktiliba nunga shilem agitsü ta peisasa pei dak temulung lemteta lira, atangji asen taküm aser temangji asen dak aketba tashidak mulung masü asen mulung asütsü. Atangji, asen temang nung tashidak meliaka, chiyongtsü koba agi temang raksar aser koba chiyongtsü asenok dak mapet, ajibo machitsü saka koba chiyongtsü asen temang dak apet, itemji bushia achitsü, kechiyong koba rara südir süaka rara ya tashi agidang raratsü. Kasaji asen temang nung aketba tashidak denji asenoki asen temang nung aliba tashi agidang raratsü. Aji oda, asen temang tashi aittsü atemaji chiyongtsü shitak peria achitsüla aser Zverev amaji asenoka asenok yari tetsüng teben aser temang arakzüa asentzü sentoktsüla. Aji oda, asenok dak tashidak ka putet dang, aji asenok asoshi taküm tatembang amai mebilemtsüla saka ano taküm nung takok tuluba angutsüang anendaka lir ta bilema tali tekümdangba alitsü aser ano temerangba inyaktsü mulungtettsüla. Atangji, asen taküm ya asen dak aketba tashidak mulung masü asen mulung lir.

OLEMSABANG

ASEN AOR TANGATETBA TEMESÜ MASÜ TESADEM ASÜTSÜLA

~ L. Kika Pongener

Ao kinji Naga nunger kin ter-teroksanger dang nungi tamasa tenuk lapoka nuji akümba kin lir. Anungji tejakleni aoba kin ka mesuka; asen Aor tangatetbaji tangar dang nungi kanga agi tesadamba asütsüla. Ajisuaka, asenok jembishinu, libaliru, inyaksangshi aser tangatetba ya kanga-sa mesu-mesur amai angudang kanga sasa-a bilemer. Atangji, asen Aor ya tangar kintem-ibo tashitemeteter kin ta kanga akümtsübur....Saka asen Aor ya khen-khenbo kanga-sa mashi-memetet aser asenok tangatetba ya kanga-sa tila aser temesu amai asen libaliru aser jaklaliru yimya agi sayur. Asen Aor dak tashimait kaji....Pei ajungtsü asoshi dang bilemba aser pei dak alaka tangarbo jenjang tajung mekümdaktsünuba....Iba shisatsü ya Aor aika dak keta lir. Ano asen Aor dak aketba jakla tamajungtiba kaji....Tenukmerem ya Aor aika dak keta lir. Yongji, tangar kin ajak dang asen Aor-sa meputepba....Asen Aor-bo pei yimer o yimer na aser pei sensopur tsüngda nunga kati ka dak tenukmerema arishiteper. Yongji, asenok kati ka nungitta yaritepba nung kanga anungakonga lir. Anungji asen Aor-i tenukmerem jakla ya meindokra; asenok kodanga telongjem malitsü aser asen Ao lima tangar lima amai kodanga renloka tejakleni maotsü.

Asenok ajaki asen Aor yimtiba Mokokchung town dak khen ranglokdi. Ni aibelener ka mesura Mokokchung town ya Nagaland State ngur Kohima District sulenbo tanabuba District akümba town ka asütsü sudi. Ajisuaka, Mokokchung town nung terenlok mapatem reprangdangra; tongtipang terenlok mapatem aikabo mali amai angur. Tanga town nung akaba ama Hospital tulu tajung mali....Shitakba-bo joko Medical College kabo alitsüla. Ibajagi, tashitak tulu keter shiranger teimba Kohima aser Dimapur leni dang bener alur. Tanü tashi Mokokchung town nung Engineering College, Science College aser Institute tajung mali. Nagaland University-a tangar kin litsü nungang amenoka lir. Tanga ajak oda yutsür; tongtipang shishilempaba tongiret (Business Establishment Center) kata amenoka mali. Küm shia Nagaland sorkar budget/sanction Mokokchung District aser town nung kwika lemsüker (?) Tesasatsü-ka, Asen Aotsür Aor Politicians, Bereaucrats, Minister/MLA ajak Kohima aser Dimapur nung dang telidak ki (Permanent resident) yua lir. Ibajagi, Mokokchung town ya temulung magütsüi senzuka yutsür asü (?)....ta nemjema bilemer. Anungji Aotsür Aor Politicians, Bereaucrats aser Minister/MLA-tem ajaki asen Aor yimtiba Mokokchung town ya senzuka meyutsüi tenuk yoka reprangtsü ajungshir. Iba mapa nungjibo Aor Elected Member ajak Party Colour kecha tebandang meli-i ka küma longjemer inyaktsü ajungshir.

Ano Mangkolemba Sub-Division ya Full Fledged District akümtsü asoshi 2013 küm nungi sorkar dang takhangba agüja arur aser Representation-a anaben-asemben tashi agütsüba angazüker. Ajisuaka, tanü tashi sorkar-i züba-züba-a toktsür amai sasa-a bilemer. Angazükba agi Mangkolemba town ya 1960's nungi mesemteta akümba town tejentiba rongnung ka lir. Iba Sub-Division nung Tzükong asem i.e. Jangpetkong, Japukong aser Tzürangkong dena lir aser yimtsüng 40-50 tsüngda ka dena alitsü sudi. Ano Aor yim dang masü Sema nunger yim-a karbo dena alitsü sudi. Talisa, iba Sub-Division ya Assam den arrtsü sua alinung; mapang shia Assam nunger den mepetmesu adokdang Mokokchung Deputy Commissioner den tongteprateptsü tetsüngda talangka asüba agi mapang talangka agir; aser ano Mokokchung nungi Administrative Officer lendong atalokdak tesem tonga arutsübaji mapang shitak nung marutetba agi; aiben mapang shitak nung tim teinyaktsü meinyakteti tetsükdaktsü ajurur. Anungji Mangkolemba ya Full Fledged District akümnungdang; ibala tebilemtsü ajakji mela-mela koktettsü. Ano iba den küsa Tulu Sub-Division ya-a Assam den arrtsü sua alinung; aiben Assam nunger den ibala mesukba timtemji ajurur. Anungji tarutsü nungpo Tuli Sub-Division ya-a Full Fledged District ka akümtsü bilema alitsüla-a ta tebilemba lemsateper.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Algeria nung tekülem mapang police-i Khristanpur 12 apu

Oran, Rongjui/Sept. 15 (Agencies): Algeria nung September 4 nü humanitarian shelter ka nung tekülem sentong agiba special force police temi meita oa temelaba makai Muslim yimsü masüba sentong agiba nung temulung melemteni yangji aliba Khristanpur 12 prong apu, ta osangtem ajanga ashir.

Oran anüdoklen kilometer 36 shi pilar L'Ayaida nung aliba House of Refuge shelter ya timtema aliba tetsürtem aser parnok kibongtem asoshi anisüngzükdak aser restoration center ama lir. Iba tesem nungya tekülem agiba takdang ka liasü, aser October 2019 nung ketdangsür temi shibangsü totuyuba agütsü, saka Khristanpur tekülem sentong agütsü asoshi iba tesem nung ano takdang tanga ka nung maneni adenshia liasü.

Iba tesem nungya ketdangsür temi mapang tatsüka tenük yoka liasü ta osangtem ajanga ashir.

Law enforcement officers temi search warrant ka nung iba tesem meita aoba sülen apuba Khristanpur 12 ya Oran nungi kilometers 40 shi pilar aliba Bethioua police station-i belener ao.

Iba operation mapang police temi Khristanpur indang literature, mobile phones aser identity cards ajunga meshia ayu, ta ashir. Tetsürtem tasüng asüngdangyatsü shir chiok aser teburtem ya aonung menua tashi pua ayu.

Pua alirtem ya Algeria nung Muslim nunger masüba

tekülem azüokba Ordinance 06-03 ozüing kübok ken o benoktsü südi ta Khristanpur tsüboteper, kong sorkari memelaba tesem nung tekülem sentong agiba mesüra Muslim nunger tamangba yimsü a n o k s h i t s ü t s ü s a inyaksangshiba memelar. Iba ozüing kübok senchi tulu achir aser tepuokdak ayur.

2006 ozüing kübok temerenshi ya küm ana nungi pongu tashi tepuokdak ayutsü aser senchi sen 500,000 nungi 1 million Algerian dinars (\$3,745 nungi \$7,490) tashi achitsü shia lir. Muslim masüba tekülem ki asoshi license nüngdaker, saka iba atema applications agütsüba ajunga magizüki yua lir.

Pua aliba Khristanpur ya tang tashi prosecutor dangi anir maru, shibai kanga keraa okadaki obendangtsü atema yoktsü.

Protestant Church of Algeria (EPA) nung affiliate süa aliba official churches 47 ajunga amai ketdangsür nungi shibangsü totuyuba agüja lir mesüa ketdangsür temi shibangtsüogo. Küm ishika tsüngta tamangba yimsü mechi Khristanpur 50 dak tema merenshiogo, ta Khristanpur yariba telok Open Doors ajanga ashir.

Algeria nung Khristanpur aser talisa Oran Region nung tamangertem mapang talangka nungi obendanger temi merenshia aruba nung shilem ka ama September 4 nü iba tesem ya meita ao. 2021 küm ketdangsür temi Pastir Rachid

Seighir aser Nouh Hamimi na aitsü aser parnoki indang kaket ayuba tesem shibangja liasü. Ano Facebook caricature ka nung Islam mezüingmeshiba dak sendakba nung Hamid Soudad küm pongu tepuokdak ayutsü January 2021 nung obendang agütsü, saka 2023 nung pa tai tatok agüja chiok.

EPA Vice-President Youcef Ourahmane-i tanüla asendenshi sentong ka ayongzükb mechi May 2024 nung küm ka tepuokdak ayutsü aser senchi achitsü obendang agüja liasü. Pastor Ourahmane ya Timothee School aser L'Ayaida refugee center tenzüksang lir.

Béjaia, Tizi Ouzou, aser Bouira regions nung aliba Khristanpuri ashiba agi, ketdangsür temi Algeria nung arogo ken o teti atema bentettsü meranga ita ishika inyaktepa arur. Aji tembangtsü atema special envoys tem shiba linük tesem balala nung EPA den affiliate süa maliba lenirtem den ajurutepdaktsür. Saka iba ya EPA melen Khristan association tasen ka tenteta yangji dendaktsütsü atema lir.

Sorkari ozüing tesashi yanglua iba kübok iba arogo lidaktsütsü nükjidong nung iba mera ya agir ta ashir.

Algeria nung Khristanpur ajak agi 150,000 shi lir, koba nütsüng yongsük 48 million nungi shilem 0.3 shi asütsü, ta Open Doors-i ashir.

Alima nung Khristanpur asoshi linük tamajungtiba 50 rongnung Algeria ya jenjang 20 buba nung lir, ta parnoki asadangteta lir.

ANO GO ABEN TSÜNGREM DEN

Temulung ana sentong

"Temulung ana adenba pur Kibuba nungi langka angutsü ta tebilem, pa pei yimya ajak nung mesüngjem" (Yakob 1:7,8).

Kodang Tsüngremi bilemba aser nai bilemba maneni tsüktepdir na tanela nung maintsü, aser Khristan ka ama nai anogo shia ajangshiba jagi na majungmesotsü kechiaser ne tebilemba jagi Tsüngrem tebilemba tsükdanger. Lenmang ana ajanga Tsüngrem tebilemba tsükdanger.

Mezüngbuba, ne shi jagi meimchir taginüba aser tebilemba bener arur. Na Khristan mekümi aliba mapang ne shi-i kechi mulung iba nung lia aru. Iba mapang na Tsüngrem nungi pilar liasü. Pa den sendaktepa alitsü kecha sentong mali asü. Ne tashi agi takok angutsü bilema merang.

Kodang na tanaben aso, Tsüngremi ne nem yimya tasen ka agütsü, saka yimya tasen denji tejen yimya dena bener aru nung tejenba jagi shi-i bilemba inyaktsü ajungshir.

Tanabuba, tetenzük nungi Tsüngremi mulungba anema inyaker nübu ka lir. Pai Eden tsüki nungi tenzüka Tsüngremi yangluba anema inyak. Satani aser pa teloki teti tamajung inyaktsü bilemer, alima shisatsü, tebilemba ne nem teti agütsür.

Ne mulung nung teti iba rara ana lir. Tsüngremi mulungba nokdangtsü merangba tashiji koktettsüsa nü dak tanela temeshi alitsüla.

Ni alima madak takok ngua alitsü tashi agütsüba asoshi Ne tenüng asanger. Shi sentong masü, Ne sentong shimtsü ni yariang.

Catholic bishops temi Karnataka nung anti-conversion law agentsü ayongzüker



Archbishop Peter Machado of Bangalore (achichilen nungi pezübuba)-i anir ketdangsür telok kati September 14 nü Bengaluru, Karnataka nung Congress tir Mallikarjun Kharge (abelen nungi pezübuba) den ajurutepdang tangokba noksa ka yangi angur.

Bengaluru, Rongjui/Sept. 15 (Agencies): Catholic bishops temi Karnataka nung sorkar kumteta aliba Congress party dang state indang anti-conversion law agentsü ayongzüker aser iba yagi talenba makai pei tamangba yimsü amshitsü aser prokshitsü temeden nung tenokdangba agütsür ta ashir.

Karnataka Protection of Right to Freedom of Religion Act ya 2022 küm September ita

taoba Bharatiya Janata Party (BJP) sorkari ozüing kuma yanglu. Parnok ya May 2023 state election mapang Congress-i atsüngdoka sorkar kumtet.

Congress-i 2023 election nübuyim mapang anti-conversion law densema BJP-i benokba constitution dak mapet telemtetba tem agentsü nangzüka liasü.

Bangalore (tangbo Bengaluru ta ajar) indang Archbishop Peter Machado-i

anir ketdangsür temi September 14 nü Bengaluru nung Congress tir Mallikarjun Kharge den par kidang ajurutepa liasü.

"Onoki pa dang Karnataka nung par party indang sorkar dang iba 'draconian law' agentsü asoshi ajungshitsü ayongzüka liasü," ta Machado-i ashir.

Kharge ya Parliament upper house nung Leader of the Opposition lir, aser pa ya Karnataka nungi lir. Par jabaso

Priyank Kharge ya state home minister lir.

Machado-i ashiba agi, par delegation nungya Bishop Francis Serrao of Mysore aser Bishop Peter Paul of Mangalore nungera liasü, aser parnoki iba ozüing ajanga senso nem 'constitutional rights' agüja aliba nung kongshiba indang tebilemtsü lemsatepa liasü.

Opposition party tem aser Khristan aser Muslim nungertem densema kin tilatemi tai apuba senzüka yutsür iba ozüing ya yanglu. Karnataka nung nütsüng yongsük 64 million aliba nungi Khristanpur shilem ana aser Muslim nunger shilem 13 lir.

"state sorkari iba ozüing tangsa agentsü atema mera agitsüla ta onoki jangja-jangja shiogo, kechiaser state nung May 2028 nung election agitsü lir," ta Machado-i ashir.

Iba senden nung Priyank Kharge dena liasü aser pai iba ken o ya November-December mapang State Assembly nung benoktsü ta ashir.

Parnoki Kharge dang state assembly indang upper house, Karnataka Legislative Council nung züngsem 11 nominate

asüba nungi Khristanpur ka-bosa shimtsü ajungshia liasü, ta Bishop Serrao-i ashir.

Nominees tem ya state sorkari shisa lemsatepba nung ajemdaker governor-i shimer.

"Küm aika Khristanpur-i secular Congress bhukuma arur, saka onoki akhangba aser tebilemtsü tejangja meshisadangra tetibo yamai malitsü," ta Jesuit Father Arun Lewis, director, Ashirwad-Jesuit Centre for Social Research & Action in Bangalore ajanga ashir.

Yimten yimsüsüba nung Khristanpur tali tetsüng ajemokra, ruling party mashi den jembitsü Khristanpur dak tashi alitsü, ta Kharge ajurur rongnung dena alisang Lewis-i ashir.

Tang Karnataka sorkar nung Khristan ana lir, K. J. George ya Minister for Energy and Tourism aser Ivan D'Souza ya Mangalore nungi elected legislator ka lir.

Parnoki sorkar mapa, shisaliok atema senotsü teyari aser sorkar meyong academic institutions aser legislative bodies nunga Khristanpur nem quota shilem ka agütsütsü ajungshia liasü.

AO OSHI ANGAZÜKDAK:

TANÜ ANGAZÜKTSÜBA OJANG



Baipalem

(v) makmakshishi (puzzle)

* Nisung tain aika mapa inyakdang baipalema aoer.

Bezübelem

(adj) armesoa aotsü tasak, onsara meilongi (lagging)

* Bezübelem nisungi kodanga senteptsütep memeneper.

OLONG PAITEP # 7651

	1				2	3				
4			5						6	
						7				
	8									
	9			10				11		
						12			13	
14										
						15				

TIPIEN

2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsü mapang süiadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

1. ____ i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. ____ kibur - (5)
13. Tebur tembar tsüngda jatepba - (4)

OLONG PAITEP # 7650 TELANGZÜBA

TIPIEN :

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso,

LANGTSÜNGLEN :

1. Alimang, 2. Pongen, 3. Samaru,
4. Nün, 6. Pio, 9. Nüngdak,
10. Yongya, 11. Kongro, 13. Ora,
14. Ata.

NAI-A YA METETTER



Canada nunger Jeremy Schofield temang nung shilem 90% tashi tattoo agi tepbanga lir. 2005 nungi pai pa temang nung tattoo ateptsü tenzük aser tattoo temji ink 40 layers shi kati tebangba lir, karbo 100 den tema tepbanga lir. Jeremy Schofield ya "most tattooed person living (multiple layers) (male)" lir.

GCU Guwahati kaketshir anati IRMC nung shilem agitsü



Guwahati, September 15, 2026 (Agencies): Girijananda Chowdhury University (GCU), Guwahati nungi kaketshir anati India tenüng nung International Russophile Movement nung shilem agitsü shimtetogo.

September 16 aser 17 anogotem Moscow, Russia nung International Russophile Movement alitsü.

GCU, Guwahati nung Bachelor

of Pharmacy (B. Pharm) kaketshir ana- Charlene Mahalia aser Prachita Duara na Hombarnü Guwahati Airport nungi apusoa ogo. India tenüng nung züngsem 30agi akümba teshimteteloknung tena züngsemer.

Iba ajanga kaketshirtemi linük balala nungi teshimtet nübotem den ajurutepa sensaksemtsü maongka angutsü aser Russia putiotsü

aser sobaliba senmang angazüiktsü.

International Movement of Russophiles ajanga public figures, culture and science nübotem, expert community züngsemtem aser linük balala nungi sensotem sabang ka nung adenshidaktsür. Russian historical aser cultural heritage wazüka ayutsü aser nüngtugu kümdaktsütsü atema parnoki mapa inyaker.

Tinsukia police tsüngdang ULFA-I tongti züngsem ka temai adok

Dibrugarh, September 15, 2026 (Agencies): United Liberation Front of Asom-Independent (ULFA-I) lennir tejen Anoljoy Asom-i September 14 nü Tinsukia Police tsüngdang temai adokogo.

Anoljoy ya Myanmar kübok Yajong area nung mapang talangka lia aru aser pa ya Burmese tsür ka den kibong

aküm ta osang angazüker.

Anoljoy ya ULFA-I nung tongti züngsem ka lir aser pa temai adokba ajanga ULFA-I tashimait akümtsü akok ta osang angazüker.

Security forces-i ULFA-I züngsemtem aser lanurtem dang telungpur maparen meinyaktsü mesüzüka arur. Telungpurtem temai

adokba ya security forces aser agencies balalai yimjung aser tensa süngjemtsü asoshi inyaka aruba nung temelenshi tajung lir ta police ketdangsür kati ashi.

Tinsukia Police-i Anoljoy dang asüngdangya tenzükogo aser idangji pai inyaka aruba aser ULFA-I den tesentaktep ayuba tali jangjatsü.

Arunachal nung tetsür 16,000 'Lakhpati Didi' jenjang tongogo

Itanagar, September 15, 2026 (Agencies): Arunachal Pradesh nung tetsür 16,000 temai 'Lakhpati Didi' jenjang tongogo aser self-help groups 15,999 nung tetsür lakh 1 anidenogo ta Deputy Chief Minister Chowna Mein-i ashi.

"Iba movement ajanga tetsürtem skills, local resources aser entrepreneurial abilities nung yarir. Kodang tetsürtemi

aazükdir, kibongtem tashitaitba akümer, lokti akangshir aser local economies ainer" ta Mein-i ashi. 'Lakhpati Didi' maparen ajanga SHGs den sendaktepa aliba tetsürtemi inyakyim balala ajanga annual household income Rs 1 lakh bosa aazüktsü yarir.

Arunachal Pradesh nung tetsür 16,000 tema iba alizüng tongogo aser 'Lakhpati Didis' ta ajatsü tetsür 36,000 tashi ajiteta

lir ta paisa ashi.

Arunachal Pradesh nung primary-level federations 1,488 aser cluster-level federations (CLFs) 91 tentetogo ta Deputy CM Mein-isa ashi.

Mein-i finance, planning aser investment portfolios bena lir aser pai ashiba agi sorkari skills, finance, technology, markets o livelihood opportunities nung temulung agütsür.



Meghalaya nung Williamnagar Civil Hospital nung medical team kati arishi küm 48 tain tetsür ka dak nungi 15-kg ovarian tumour ka takok ngua agiteta endokogo. Iba surgery ya Senior Gynaecologist Dr. Vince Momin aser Anaesthetist Dr. Sengrak Marak nati anir Medicine Specialist Dr. Tanmoy Momin aser nursing o operation theatre teams ajanga agia liasü. Tetsürta ya küm pungu jungnüa tepok nung tashitsü atua timtema aru aser la temulungjang nunga timtem aliba ajanga surgery high-risk liasü, saka iba surgery agiba sülen la temang junga dang lir ta osang ajanga ashi.

SEN JULI KA SHIA ARUA LIR

Mokokchung town tenla ki (MTBA) anasa tebur sen juli ka nung tongtibang documents kar dener indoka aliba süsüponger kari shia Tir Yimyim Office Mokokchung nung tokja lir.

Kiburi kuli tejangja den office mapang arua agizükangma.

Russia-i Kyiv nung petrol station, warehouse facility tem amak

Kyiv, Rongjui/September 15 (Agencies): Drone kati Mongolbarnü Ukraine yimtiba Kyiv nung petrol station ka makogo, ta Mayor Vitali Klitschko-i ashi. US tir Donald Trump-i, Ukraine aser Russia nati kati ka indang energy facility tem memakteptsü mulungtepogo ta ashiba sülen anogo ka lir iba ya ataloka liasü.

Petrol station amakba mapang nisung ka yiru, aser yimti kübok tanga tesem nunga warehouse facility tem makogo, ya Klitschko-i Telegram messaging app ajanga metetdaksü.

Russia-i tawa Kyiv nung petrol station tem amak tenzükogo. Tesüiba ita ishika tsüngda Russia-i petrol station 300 shi makogo, ta Ukraine nunger ketdangsürtemi metetdaksü.

Moscow-i Ukraine amakba mapang kidanger Poland-ia lendong nungi jenboa alitsü atema mapang tatsüka asoshi military aviation operation tem tenzüka liasü, ta Poland indang Armed Forces-i X ajanga metetdaksü.

Ukraine aser Russia na meteka aliba linüktem indang airspace-i Military drone tem

aiba ajanga iba rara ya NATO indang arrtsü adena prokshia aotsü ta tsübua bilemer.

Lithuania nung NATO fighter jet kati Mongolbarnü drone ka khazüka yokogo, ta Lithuanian National Crisis Management Centre-i ashi. Drone yimoka aitba lazükba sülen linük yimtiba Vilnius aser yimti temeket nung aliba tesemtem nung tekümdangsü metetdakja liasü.

Kasa mapang nung Russia nunga Ukraine-i missile agi e-commerce company Ozon indang warehouse ka raksatsüogo. Taganrog yimti nung iba warehouse densema tanga facility tema makogo, ta regional governor-i Telegram ajanga metetdaksü.

Maneni Samara tesem nung drone agi industrial facility ka makogo, ta Governor Vyacheslav Fedorishchev-i ashi. Iba tesem nung ya totzü asüngtetdak aika amenoka lir.

Tir Volodymyr Zelenskiy-i Hombarnü sangdong ka ajanga, energy facility dak sendakba nung Russia-Ukraine ceasefire atema US-i benokba ya Moscow-i dang tashi anga anidakra iba inyakyim sülen anidaksü Kyiv renema lir, ta shiogo.

US-i Iran nuclear tekolakba nem tenokdangba agütsü

Dubai, Rongjui/September 15 (Agencies): United States-i, Iran indang nuclear tekolakba, Mohammad Eslami iba hopta Vienna nung International Atomic Energy Agency (IAEA) annual General Conference nung shilem magidaksütsü atema tenokdangba agütsüogo. Iran nem tenokdangba balala agütsür aliba tai atoktsü atema mepeshiba United Nations Security Council-i magizükba sülen tang iba jenjang agiogo.

Eslami aser pa meina aotsü aliba ketdangsürtem anogo pongu atema iba senden nung adentsü asoshi renemer aliba athitsüsa kümogo, kechiyong Austria-i parnok indang visa magizük, ta Iranian state media-i ashi.

Iran indang Atomic Energy Organization tekolakba nem UN Security Council-i, pre-2015 multilateral "snapback" framework kübok senzusenpongtsü atema tenokdangba agütsür lir. Iran indang nuclear aser ballistic missile programme tem dak sendaka aliba ketdangsürtem UN züngsem linüktemi aitsü mesüra süia aotsü memelar.

Iba seden lapokba sentong nung o jembiba mapang IAEA dangi Iran ambassador Reza Najafi-i ashiba agi, Eslami

indang visa mezüngbo agizüker liasü. Paisa, iba jenjang agiba ya züngsem ka ama Iran indang temeden agintsüba lir, ta ashi.

Iran indang Foreign Ministry otongdar Esmaeil Baghaei-i, iba telemtetba agitsü atema Austria nongshiba atema US aitsüogo, kechiyong 2021 küm Iran indang Atomic Energy Organization tekolak asütsü atema shimba sülen Eslami Vienna nung IAEA indang General Conference ajak nung dena o jembia aruogo, ta ashi.

Iran aser Russia napronglai iba telemtetba agiba ya Iran nunger ketdangsürtem linük balalai aotsü atema visa magütsütsü asoshi longjemer inyakba ka lir, ta bilemer.

Taoba küm France, Germany aser United Kingdom (the E3) nungeri snapback mechanism ya benokshia liasü. Snapback sanction tem rongnung, senzusenpongtsü atema tenokdangba agütsüba, UN conventional arms embargo, ballistic missile development aser capabilities dak sendakba nung tenokdangba agütsüba, rongsen balala tamshi mejungi kümmdaksüba aser nuclear dak sendakba technology balala yanglutsü atema tenokdangba agütsüba densema lir.



Java Sea nung tzüngsang-mopung majungba ajanga passenger rong ka makepokba lendong nungi takum kumzüka aliba nisung ka ketdangsür temi Banjarmasin, South Kalimantan nung rongnendak tesem ka tonga anir arudang tangokba noksa nung angur. Iba rong makepoker nisung 129 samar aliba bushiba maparen nung coastguard aser navy personnel 1,100, aircraft ter aser rong 17 yoka lir.

PAK nung internet shibanger anogo 100 alemer

Muzaffarabad, Rongjui/Sept. 15 (Agencies): Pakistan-administered Kashmir nung internet amshiba nung tenokdangba tesashi agütsür anogo 100 dak tema lir.

June ita tetenzüklen electoral melenshitsü atema longkak aitba sülen iba territory nung mobile data aser broadband services shibangsüogo. Mepetmesü adokba nung langzüa tesülen elections round asem agi aser tatembangba August 10 nung agia liasü. Ajisüaka internet shilem kar shibangba ajanga sorkar tasen kumtetaka anogoshi libaliru nung maneni timtem ajurur.

Online banking atema amshiba websites aser apps tem mamshiteter, anungji region nung business inyakyim nung

kongshir. Internet shibangba ajanga kaketshirtem asoshi academic tsütsüa timtem ajurur, aser sorkar entrance exams tem thinener.

Internet shilem kar shibangba ya June 5 nungi tenzük, ta internet shibangba asadanger NetBlocks ajanga ashir. July 27 nü local elections agitsü lia mepetmesü ya tenzüka liasü.

Kashmir ya mangatettep aliba region ka lir, koba India aser Pakistan rakteper. Pakistan-administered Kashmir ya semi-autonomous system ka kübok yimsü asür aser yangji ato kilonser aser legislative assembly züngsem 45 lir, kong Indian-administered Kashmir nungi Pakistan tesem balala nung

aliba refugees atema menden 12 wazükja aliba dena lir.

June 5 nü ketdangsür temi Jammu Kashmir Joint Awami Action Committee (JKJAAC) shibangtsü, koba legislature nungi menden 12 ya agientsü asoshi akhangba grassroots umbrella organization ka lir.

Ketdangsür temi June 5 nü internet shibangtsü aser longkak aiterem apu tenzük aser July 27 nü azüdokshia tembang.

Iba longkak aitba mapang ozüng amshir tenet densema nisung 50 dak tema süogo, ta yangji alirtemi asadangteta lir.

Security mechi longkak sashia aitba tesem kar nung vote magütsü, saka tanüngba autonomous region nungi election results nung ajemdaker sorkar kumtet.

Vijay-i UK nung sen crore 12,300 investment...

(Tapak 3 nungi...)

Tamil Nadu sorkari maparen takok ngua inyakyonga aotsü asoshi takokba tashi teyari agütsütsü nangzükogo, ta sorkar sangdong ka ajanga metetdaksü.

Kasa mapang nung Ashok Leyland Managing Director Dheeraj Hinduja, Finolex Industries Executive Chairman Prakash P Chhabria aser Director Ritu Prakash Chhabria nungeri Hombarnü London nung Tamil Nadu Chief Minister Vijay den ajurutepogo.

Senden nung Hinduja-i,

Tamil Nadu nung Hinduja Group-i mapa benoka inyakba indang aser Chennai nung August ita Vettri Tamil Nadu Investors' Conclave nung sen crore 2,500 entoka mapa inyaksü atema tenangzüktepba yanglur aliba kübok jenjang balala agiba indang Chief Minister nem metetdaksü.

Lenirtemisa Tamil Nadu nung parnok inyakyim atsülanga aotsü nangzükba den, renewable energy aser talisa wind power nung sen entoktsü tejangraba aliba lemsatepa liasü.

Senden nungsa Tamil Nadu nung yangluba commercial garitem export asüba tashitaitba kümmdaksütsü aser automotive industry nung state ya tongtibang export hub ka kümmdaksütsü asoshi sensaksemogo.

Senden nung UK dangi India Ambassador Kumaran Periyasamy, Minister (Economic), London nung High Commission of India aser India-UK FTA chief negotiator Nidhi Mani Tripathi, den Tamil Nadu sorkar ketdangsürtemi shilem agia liasü.



Yemen linük kübok Aden yimti nung nisung ka gas cans anasa mena aliba noksa nung angur. Yemen nung tensa tamajungba akumba ajanga ita tenzük kibong 18,000 shi tesem balala nung jenshia lir aser nisung 125,000 dak iba timtem agi kongshiogo, ta United Nations Office for the Coordination of Humanitarian Affairs (OCHA) ajanga ashir.

DDF League-cum-late Hejeto Ayemi Football Trophy tenzükogo



Dimapur, Rongjui/September 15 (TYO): Dimapur District Football League-cum-Late Hejeto Ayemi Football Trophy September 15 nü DDSC Stadium, Dimapur nung tenzükogo. Iba asayamung ya October 5 nü tashi asayatsü.

Asayamung ya asür Hejeto Ayemi tenüng nung Dimapur District Football Association (DDFA)-i ayongzüka asaydar.

Asayamung lapokba sentong nung o jembiba mapang MLA & Advisor, Department of Tribal Affairs and Election H. Tovihoto Ayemi-i, district jenjang nung football asaya asüngsashiba aser lanur asayartem nem parnok sempet sayatsü asoshi maongka agütsüba atema DDFA dang kanga pelaba lemsatep.

Tovihoto-i, iba asayamung ya par kibong asoshi kanga tongtibang, kechiyong iba ya tebu asür Hejeto Ayemi tenüng

nung asayar, ta ashi. Paisa, tebu tenüng nung district-level football asayamung ka tenzüksü atema DDFA-i par kibong den tongtepba indang bilemtetshia jembiba, koba par kibongi tebu tenüng maneni mesamai toktsütsü aser Dimapur nung aliba lanurtem atema sabang ka agütsütsü asoshi mapa tajung ka ta agizüka liasü, ta ashi.

Maneni Tovihoto-i, iba asayamung ya saisabong tetoktepba ka dang masü saka iba ajanga lanurtem nem tokteptsü, yimayimpong tajung sübatsü, tembar yimteptsü, peisasa dak temulung lemteta akümtsü aser parnok sempet jangjatsü atema maongka tajungka lir ta ashi.

Tovihoto-i, tsürapur, school, shisaluyim riju balala, shishilembartem, lokti tentet balala, lokti lenirtem aser football asaya meimertem dang DDFA inyakyim nongita yaritsü aser lanur asayartem nem

maongka tali agütsütsü ayongzü.

Paisa, district nung sustainable football ecosystem ka yanglutsü nüngdakba lemsatep.

Tovihoto-i, Ayemi'er kibongi 2026 küm nungi tenzüka küm 15 tashi iba asayamung sponsor asütsü mulunga agizükogo, ta metetdaksü.

Kasa mapang nung DDFA tir Mughato Sumi-i, district nung football asaya ajungkettsü aser sempet aketba asayartem anitetsü atema iba asayamung ya koda tongtibang iba indang lemsatepa liasü.

Sentong nung Vilika Zhimomi-i ken tajung ka aten aser Olando Yimchunger, Executive Member, DDFA-i ketdangsüa asayartem tenangzükepba agia liasü.

Asayamung nung mezüngbuba asaya ya Dimapur Sporting Club aser Thahekhu Youth Sporting Club na tsüngda asaya liasü.

26buba NSF Martyrs' Memorial Trophy Nov 13 nü tenzüksü

Kohima, Rongjui/September 15 (TYO): 26buba NSF Martyrs' Memorial Trophy ya November 13 nü nungi December 3 tashi anogo 17 asayatsü, aser final ya Hornbill benjung amungba mapang asayatsü, ta asayamung ayongba committee-i Mongolbarnü metetdaksü.

Iba asayamung ya Naga Students' Federation (NSF) tawabangba kübok Angami Students' Union-i ayongzüka asayatsü. Taküm iba asayamung atema Nagaland Olympic Association (NOA)-i teyari agütsüba den Hornbill Festival 2026 den longjemer ayongzüka asayatsü.

Asayamung ayongertemi ashiba agi, Naga nunger football asayartem nem sabang tuluba ka agütsütsü nükjidong nung NOA den longjemer iba asayamung ayonger aser Hornbill Festival den longjemba ya tanga state nungi nüburtem tali atsüa arutsü atema lir.

"Onoki iba asayamung nung asayaba asayartem state adena or tanga tesem nunga asayadaksüner," ta parnokisa shisem.

Parnokisa, football asaya meimba linüktem nungi Hornbill benjung atema Nagaland semdangba football scouts aser dignitaries tem nem asayatem repringdakja local asayartem jangjadaksütsü asoshi state sorkari teyari agütsütsü imlaba lemsatep.

State nung asayamungtem nung kanga junga asayaka sempet aketba Naga nunger football asayartem temaba jenjang nung aliba club tem nung oa masayatetba tebilemtsü aliba asayamung ayongertemi lemsatep. Parnoki ashiba agi, asayartem club tulutem nung oa asayadaksütsü aser tongtibang asayamungtem nung asayadaksütsü atema maongkatem bushitsü asoshi Olympic Association aser tanga stakeholder tem den sensaksem kadar.

Taküm iba asayamung nung team 40 dak temai shilem agitsü imlar. Ajisüaka anogo 17 tsüngda team 40 dak tema asayadaksütsü ta temela masütsü, ta asayamung ayongertemi ashi. Asayamung

tetenzüklenbo anogo nung asaya pezü tashi asayadaksütsü atema technical committee-i asadangdar.

Taoba asayamungtem ama takümbo seeded mesüra team tem jaoka masayadaksütsü, aser team ajak mezüngbuba round nungi asaya tenzüksü.

Asayamung nung ajak senteper senpet sen lakh 8.80 agütsütsü. Asayamung akoker nem senpet sen lakh 3.5 den kuli kakat aser medal agütsütsü aser runners-up nem sen lakh 2 agütsütsü. Semifinal nung tamakok anguba team ana nem senpet sen 60,000, aser quarter-finalist tem nem 30,000 agütsütsü.

Jurila sempettem rongnung Best Custodian, Best Defender, Best Midfielder, Golden Boot/Top Scorer, Fair Play Award aser Most Promising Player Under-19 densema lir aser parnok ajak nem senpet sen 10000 agütsütsü. Player of the Tournament nem senpet sen 30,000 aser asaya shia Player of the Match award agütsütsü.

Form tem September 28 nungi angutsü aser form benoktsü atema tatembangbuba anogoji October 24 asütsü. Fixtures ya November 2 nü yanglutsü. Form taah sen 300 aser entry fee 7,000 asütsü.

Form ya Kiran Sports, Dimapur; G-Sports, Chumoukedima, Sports World, ASU office aser Urban Concerns, Kohima, aser Falcon Corner Medziphema nung angutsü.

Kasa mapang nung asayamung ayongba committee-i asayamung ahaayangtsü asoshi taküm tendanga tender process ka sangdongogo, kong ground management aser hotel/restaurant facility tem densema lir. Tender taah sen lakh 12 asütsü aser tender atema Angami Students' Union-i telemtetba agitsü.

Maongka ya mezüngbuba kakatshir lokti tentetnem nem agütsütsü aser iba sülen associations, organisations aser Arogo balala nem agütsütsü. Tender benoktsü asoshi September 17 nungi 30 nü tashi mapang lapoka toktsütsü.

Taylor-i Sachin indang ODI record ka ajatetogo



Rongjui/September 15, 2026 (Agencies): Zimbabwe nunger asayar tejen Brendan Taylor-i Sachin Tendulkar ajateta pa ya tebur ODI asaya puti otsü nung talangtiba asayar kümogo. Mongolbarnü Harare nung Australia den mezüngbuba ODI asayaba mapang pai iba otsü tasen yanglua liasü.

Taylor ya ODI nung küm 22 ser ita pezübuba asayadar aser pai Tendulkar indang ODI record ajatetogo, shiba 2012 küm asaya nungi manen tsüngda küm 22 ser ita asem asaya liasü.

Ajisüaka Tendulkar ya ODI

asaya nung run (18,426) timtiba yangluba aser asaya timtiba (463) nung asayaba asayar lir.

Arishi küm 40 tain Taylor ya 2004 küm ODI nung mezüngbuba asaya aser pa ya Zimbabwe nunger rongnungi batter tajungtiba ka lir. Pai ODI asaya 207 nung century 11 yanglur lir, koba Zimbabwe nunger batter tem rongnungi century timtiba yangluba lir.

Taylor 2021 küm international cricket asaya nungi anen, saka ICC indang Anti-Corruption aser Anti-Doping codes anema inyaksangshiba

atema 2022 küm pa nem küm asemser tesadang atema tenokdangba agütsü.

Tenokdangba agütsüba tembangba sülen pa 2025 küm asaya tenzükshi. South Africa aser Namibia na den 2027 ODI World Cup ayongzüka asayatsü renemba mapang pa asayshi tenzükogo.

Küm 12 sülen Mongolbarnü linük ana tsüngda Zimbabwe nung mezüngbuba ODI ka asayaogo.

Tang asaya aliba asayamung nung asayartem:

Australia: Mitchell Marsh (captain), Travis Head, Cooper Connolly, Josh Inglis, Alex Carey, Matt Renshaw, Ollie Peake, Xavier Bartlett, Nathan Ellis, Adam Zampa, Spencer Johnson.

Zimbabwe: Brian Bennett, Ben Curran, Innocent Kaia, Brendan Taylor, Craig Ervine, Sikandar Raza (captain), Wessly Madhevere, Brad Evans, Newman Nyamhuri, Wellington Masakadza, Blessing Muzarabani.

BILEMDANGANG

"Tuluka aginür saka tilaka dang agütsünübaji nisung."